

HE TUHINGA WHAKAAHUA

Te whakamāramatanga:

Ka whakaahua i tētahi āhuatanga e taea ai te kaupānui te kite i te wheako a te kaituhi.

Te pūtake:

Ko te whakaahua i te āhua, ngā āhuatanga, me ngā mahi o tētahi tangata, o tētahi kararehe, o tētahi atu mea rānei.

Ngā momo whakaahua:

E rua ngā momo whakaahua ko te *whakaahua whaiaro* me te *whakaahua whānui*.

Te Pūmanawa Tautono iTunes

Ko te pūmanawa tautono¹ iTunes tētahi tūmomo hōtaka e tukua mai ai ngā kōnae whakarongo², me ngā kōnae whakaata³ i te ipurangi.

E whakamahia whānuitia ana tēnei momo e te tini tangata hei tuku mai i ngā waiata i te ipurangi ki ā rātou taro paoho waiata. Koinei tōna tino pūtake. Ko te tini e kōrerotia nei, ko ngā momo tāngata katoa huri noa i te ao pakeke mai, rangatahi mai, taiohi mai, tamariki mai anō hoki. Mā tēnei pūmanawa tautono hoki e taea ai te tangata ngā kiriata, ngā whakaahua me ngā tū paohotanga huhua te tuku mai ki ā rātou tū taro paoho maha.

E rata ana te tokomaha tangata ki tēnei pūmanawa tautono i te mea ka whai wāhi rātou ki te tirotiro haere i te ipurangi ki te rapu i ngā waiata o nāianei, o ngā rā o mua hoki. E āhei ana rātou ki te whakarongo ki ngā waiata i mua i te tuku mai, ā, ki te pai te waiata ki a rātou, he ngāwari noa iho te hoko mai me te tuku mai.

Koinei tētahi o ngā pūmanawa tautono maha hei tautoko i te tukua mai o ngā tūmomo paohotanga, heoi ko te āhua nei ko iTunes tērā kua mōhiotia whānuitia, kua whakamahia whānuitia nō te āhua o te pakihī nā rātou te pūmanawa nei i whakahoahoa, arā, ko Apple tērā.

Kua rahi ake te tokonui tāngata o te ao i ēnei rā e hoko mai ana i ngā rorohiko, i ngā taro paoho, i ngā waea hoki nā Apple i whakahoahoa. Nā tēnā, kua waia haere rātou ki ngā whakamahinga iTunes. He maringanui a Apple i tēnei o ngā āhuatanga. Otirā, i te mea he pūmanawa tautono atu anō kei te ipurangi e taea ana ēnei mahi katoa me te kore utu, ka raru pea tēnei pakihī, me ngā kaitito waiata ā haere ake nei.

Kāti ha, he nui tonu ngā painga o te pūmanawa tautono iTunes mō ngā hunga maha ahakoa nō hea, ahakoa ko wai, ahakoa pakeke hoki.

Te tapanga

Te whakamāramatanga

Te whakaahuatanga

Te whakakapinga

Hei tautohu i te kaupapa o te whakaahua.

Hei tautohu i te kaupapa, hei whakamārama hoki i ētahi o ōna āhuatanga matua.

Hei whakaahua ki te kaupānui i te āhua me ngā mahi o te mea.

Hei whakarāpopoto, hei whakakapi hoki i te tuhinga ki tētahi whakaaro whānui.

¹ downloading software

² audio file

³ video file

Ngā āhuatanga reo

- Te kupu ingoa → Ko te pūmanawa tautono¹ **iTunes** tētahi tūmomo hōtaka ... (para 1)
..., me ngā **kōnae whakaata**² i te ipurangi. (para 1)
... e te tini **tangata** hei tuku mai ... (para 2)
... ki ā rātou **taro paoho waiata**. (para 2)
... i te ao **pakeke** mai, **rangatahi** mai, **taiohi** mai, **tamariki** mai anō hoki. (para 2)
Mā tēnei **pūmanawa tautono** hoki ... (para 2)
... haere i te **ipurangi** ki te rapu ... (para 3)
... i ngā **rorohiko**, ... (para 5)
- Te kupu āhua → ... ki ā rātou tū taro paoho³ **maha**. (para 2)
Kua **rahi** ake ... (para 5)
- Te kupumahi → ... ki te **tiroiro haere** i te ipurangi ... (para 3)
... i te **tukua** mai o ngā tūmomo ... (para 4)
..., kua **whakamahia** whānuitia ... (para 4)
... nā Apple i **whakahoahoa**. (para 5)
- Te kupu te hei tohu i te tini → ... tēnei momo **e te tini tangata** ... (para 2)
Ko te tini e kōrerotia nei ... (para 2)
E rata ana **te tokomaha** ... (para 3)
- Te reo ā-kaupapa → ... ki ā rātou tū **taro paoho**⁴ maha. (para 2)
... o ngā **pūmanawa tautono** maha ... (para 4)
... ko **iTunes** tērā ... (para 4)
... arā, ko **Apple** tērā. (para 4)

¹ downloading software

² video file

³ digital multimedia player

⁴ digital multimedia player

Ngā tohutoro

Te Aka Māori Dictionary Online. I tangohia i te 11/09/10 mai i <http://www.maoridictionary.co.nz>

For further information about Descriptive Writing see:

Aronui (2008). He Manu Tuhituhi. *He Tuhinga Whakaahua: He Pukapuka Arataki i te Kaituhi*. pp. 31–51. Te Papa-i-oea: Aotearoa.

Aronui (2008). He Manu Tuhituhi. *He Kura Tuhituhi me He Manu Taketake: Te Pukapuka Aratohu mā te Kaiako*. “He Tuhinga Whakaahua.” pp. 63–80. Te Papa-i-oea: Aotearoa.

He mea waihanga mō tētahi kaupapa a Te Tāhuhu o te Mātauranga.

Mana pupuri © Te Karauna 2011
Pūmau te mana.



Te Kāwanatanga o Aotearoa

